

## Kalata gwa kwanda ugwa Peeteli Isyakulongosya

Peeteli, aali ntumigwa gwa Jesu Kilisiti, aabasimbiile kalata ujū aBakilisiti aba baali nkiisu iki mmasiku aga bikuti Butuluki. Aasimbile kalata ujū ukubakasya, paapo baakubilwaga kunongwa jaa kija Bakilisiti. Ikubakumbusya ukuti Jesu Kilisiti aakubiilwe, kangi aataamiigwe fiijo mbuumi bwake ubwa pakisu, po aBakilisiti boope bikutaamigwaga. Na paapo bikukaba ingubilo nyingi, poope ingubilo isyo aasikubapa amaka. Kyala ikubasajaga mu ngubilo isyo. Peeteli ikubakasya aBakilisiti ukwendelela ukija na kajiilo akaa bandu baa Kyala.

<b>Isi silimo mwa kalata ujū</b>
Peeteli ikubaponia abiitiki
Ikugwa ulupi kwa Kyala ku bupoki bwabo
Ikubakasya ukija biikemo paapo basunguliigwe ukija bano
Muno bikulondeligwa ukubabombela abalongosi, ni sya ku
Ukukubilwa kunongwa jaa kunkonga Kilisiti
Ukukitiima ikipanga kya Kyala

### *Uluponio*

<sup>1</sup> Kalata ujū afumile kumyangu une Peeteli, ne ntumigwa\* gwa Jesu Kilisiti. Ngubasimbila

\* **1:1 1:1** *Uantumigwa* Bala iisya **Abatumigwa** ku Isyakulingaania.

umwe mwe muli basunguligwa baa Kyala, kangi mukutuugala bo ulwa baheesya mfiisu ifya mu Ponti, Galatija, Kapatokija, Asija na mu Bitinija.

<sup>2</sup> Umwe musunguliigwe bo muno Taata Kyala aabingiliile ukufuma bo ikupela ikiisu, ukuti mwelusigwe na Mbepo Mwikemo nu kuntiila Jesu Kilisiti, ujua aabamiisiile iilopa lyake ili lyalyoniike kunongwa jinu. Kyala abongele iliipyana nu lutengaano ku bwingi.

### *Jesu atwele ulusubilo lwa buumi*

<sup>3</sup> Atuufigwege Kyala, uGwise ugwa Ntwa gwitu Jesu Kilisiti! Ku kibabilisi kyake ikikulumba aatapelile, ukuti tupaapigwe kangi ulwa bubili, ku njila jaa kunsyusa Jesu Kilisiti ukufuma mbafwe. Aabombile bo ulo ukuti tujega nu lusubilo ulunywamu,

<sup>4</sup> nu kuti twambilile isajo isi Kyala ababiikiile kumwanya umwe mwe bandu baake. Isajo isyo aasitikonangika, aasitikubola pamo ukukuulupa.

<sup>5</sup> Isajo isyo syinu, mwe mukulindiligwa na maka agaa Kyala, ku njila jaa lwitiko lwinu mpaka bo mukabile ubupoki, ubu bukwise kusetuligwa pi isiku ilya kummaliikisyo.

<sup>6</sup> Pi isiku ilyo mukwisa kusekela, na paapo akabalilo aka mukulondigwa ukukaba ubutolwe kukabalilo, kunongwa jaa ngubilo isya luko nu luko,

<sup>7</sup> isi sikulugela ulwitiko lwinu, ukuti lunangisye ukuja lwa bwanalooli. Ulwitiko lwinu lakafu ukukinda ishabu. Ishabu, bo ulwa lwitiko lwinu, jikukosigwa mmooto

ukuti jije nunu, kangi jikasigwe. Leelo isahabu jikoonangika. Loope ulwitiko lwinu aalukugeligwa nu mooto ukuti lukasigwe. Kunongwa jaa isyo aamukwambilila induufyo, ubusisya nu lwimiko bo Jesu Kilisiti ikusetuligwa pi isiku lila.

<sup>8</sup> Umwene munnganile na paapo mukaali mukammbona, na ulu mukammwitika na paapo mukammbona. Mukwisa kusekela ulusekelo ulu mukabagila ukulingaania,

<sup>9</sup> paapo aamukwambilila, kangi muli pakwambilila, ubupoki bwinu ubu jo nyango jaa lwitiko lwinu.

<sup>10</sup> Inongwa isya bupoki bwinu ubo, abakunguluka baalyeneesiisye fijo ukuti bamanye. Baakungulwike inongwa isya ipyana lya Kyala ili aabingiliile ukubapa umwe.

<sup>11</sup> Mbepo gwa Kilisiti jo ujū aali nkati mmyabo, aakungulukaga syope ingubilo sya Kilisiti, nu busisya ubu aabukukongaga. Abakunguluka bala baalondile fijo, ukuti bamanye ko kabalilo kaliku akaa nongwa isyo.

<sup>12</sup> Kyala aabasetuliile abakunguluka bala, ukuti inongwa isi baakungulukaga sikaabatulaga abeene, looli umwe. Inongwa isyo syo isi mupiliike ku bandu aba baabalumbiliile iNdumi iNunu ku maka agaa Mbepo Mwikemo, ujū Kyala aalintumile ukufuma kumwanya. Abandumi boope bikunyonywa fijo ukusimanya inongwa isyo.

*Abiitiki bajege biikemo*

13 Kunongwa ijo mwitendekesye mu ndumbula syinu, mujege maaso fiijo, kangi mubiike ulusubilo lwinu mwi ipyana ili aamukapeeligwa bo Jesu Kilisiti ikusetuligwa.

14 Mujege baana baa Kyala abaa lwijiisyo. Mulingiitikaga kangi ukufikonga ifinyonyo fyinu ifibiibi ifi mwali nafyo bo mukaali ukubumanya ubwanalooli bwa Kyala.

15 Kunongwa ijo, bo ulu Kyala ujū abakooliile mwikemo, nuumwe mujege biikemo kuli syosa isi mukubomba,

16 paapo sisimbiigwe mwa Kalata uMwikemo ukuti, “Mujege biikemo paapo une ndi mwikemo.”†

17 Po mukunsuuma Taata ujū ikunndonga kukuti mundu ukukongana ni mbombo syake, kisita kwegamila kamo. Kunongwa ijo munti-ilege fiijo nkabalilo aka mukutugala pakiisu ulwa baheesya.

18 Namanga mumeenye ukuti Kyala aabaabwile ukufuma nkajiilo kiinu akasita kubagisya, aka mwalyambiliile ukufuma ku biisukulu biinu. Akaabahombiile utundu utwa ntengo ugwa paasi, bo ifeesa pamo isahabu utu tukoonangika,

19 looli aabaabwile mbutulanongwa ku njila jaa ilopa ilya ntengo fiijo ilya Kilisiti, ujū aali bo akang’oosi‡ akanunu akasita kababye nakamo.

20 Kilisiti ujo aabiikiigwe na Kyala ukukongana nu lubaatiko lwake bo ikiisu kikaali ukupeligwa, looli aaguuliile mpaka pakabalilo aka, akaa

---

† 1:16 1:16 Bala kalata gwa Abanyaleebi 11:44-45. ‡ 1:19 1:19 Akang’oosi Bala iisya **Kang’oosi** ku fanyakalingaania.

kummaliikisyo, po alinkuboneka kunongwa jinu.

<sup>21</sup> Aaliisile ukuti abalongosye ukummwitika Kyala, ujũ aalinsyusiisye Jesu nu kũmpapo ubusisya, ukuti mummwitike nu kũnsũbila Kyala.

### *Ukũpaapigwa ulwa bũbili*

<sup>22</sup> Paapo mukusikonga imanyisyo sya bwanalooli, mwelusiigwe ukuti mugananege kisita busyobi. Kunongwa ijo mugananege ni ndumbula jooa.

<sup>23</sup> Mukulondigwa mujege nu lugano ulu, paapo mupaapiigwe ulwa bũbili, somma ku bapaapi aba bikufwa looli ku mpaapi ujũ atikufwa, ku njila jaa isyu lya Kyala ili likujako bwila na bwila.

<sup>24</sup> Kalata uMwikemo ikuti,  
 “Abandu boosa bo ulwa liisu,  
 nu bununu bwabo bũli bo ubulenge ubwa ndiisu.  
 Iliisu nu bulenge fikũma, fikugwa paasi,  
<sup>25</sup> looli iliisya lya Kyala likujako bwila na bwila.” §  
 Iliisya ilyo jo Ndũmi iNunu iji mwalũmbililiigwe.

## 2

<sup>1</sup> Kunongwa ijo, mubuleke ubũbiibi boosa, ubutungulu, ubusyobi, ubũfi nu kujobana ubũbiibi.

<sup>2-3</sup> Akabalilo aka monjile, kangi mwandile ukũmanya ukuti uNtwa nnunu.\* Po bo ulwa

---

§ 1:25 1:24-25 Bala kalata gwa Jeesa 40:6-8. \* 2:2-3 2:2-3 Bala kalata gwa Isabũli 34:8.

baana abafyele aba buumiilwe amabeele agaa bannabo, munwege ulukama ulwa mwa Mbepo ulusita kongaania nafimo, ulu aalukubatwala umwe ukukula nu kupokigwa.

*Abiitiki basunguligwa baa Kyala*

<sup>4</sup> Hntwa Jesu lyo ibwe ilyumi ilya kujengela. Hliibwe ilyo abandũ baalikaanile, looli Kyala alisungwile, kangi lya ntengo nkyeni mmyake.† Ulu musegelele kwa Jesu,

<sup>5</sup> po na nuumwe Kyala ikubabombela ulwa mabwe amuumi ukujenga itempeli ijaa mwa Mbepo Mwikemo. Mu tempeli iyi, umwe kangi muli bapuuti abiikemo. Mukusoosya amakemo agaa mwa Mbepo aga gikunhobosya Kyala, ku maka agaa Jesu Kilisiti.

<sup>6</sup> Po mwa Kalata uMwikemo Kyala ikujoba ikuti,

“Namukeete, uko nkaaja akaa mu Syoni,  
mbiikile iliibwe ilya lwalo,  
kangi ibwe ili ndisungwile, kangi lya ntengo.  
Umundu gwesa ujũ ikummwitika ujũ jo ibwe  
ilyo,  
atikwisa kusukamo siku.”‡

<sup>7</sup> Iibwe ilyo lyo lya ntengo kumyinu umwe mwe mukummwitika, looli kuli aba batikummwitika,  
“Iliibwe ili abajenga nyumba baalikaanile,  
lyo lijile ibwe ikalamba pa lwalo, pa  
nguto,”§

<sup>8</sup> na,

“Iliibwe ili abandũ aabikwitikangapo,

---

† 2:4 2:4 Bala kalata gwa Matai 21:42. ‡ 2:6 2:6 Bala kalata gwa Jeosaja 28:16. § 2:7 2:7 Bala kalata gwa Isabuli 118:22.

ili aalikubapelelaga abandu ukugwa.”\*  
 Aabikwitikaga paapo bakaaliitiike iisyu lya Kyala, mo muno baabaatikiliigwe na Kyala ukufuma kubwandilo bwa kupela ikiisu.

<sup>9</sup> Looli umwe muli basunguligwa baa Kyala, umwe muli bapuuti baa kinyafyale, umwe muli kikolo ikiikemo, kokuti muli bandu baake juujo.† Mwasunguliigwe ukuti mufumusyeye induufyo sya Kyala, uju aabakooliile ukuti musookemo mu ngiisi, ukuti mujege kumyake ndumuli lwake ulununu.

<sup>10</sup> Kubwandilo mukaali bandu baa Kyala, looli akabalilo aka muli bandu baake. Kangi mukaalyambiliile iipyana lya Kyala, looli akabalilo aka mulyambiliile.

### *Ukubimika abalongosi boosa*

<sup>11</sup> Bakundwe, ngubapyelesya, paapo muli baheesya nkiisu muno kangi mukukinda, mufileke ifinyonyo fyinu ifya tandu utwa pakiisu, ifi fikulwa ubwite na nuumwe.

<sup>12</sup> Mujege na kajiilo akanunu pakati pa bandu abapanja, aba mukutugala nabo. Po nalinga bikubajoba ukuti mukubomba kabi-ibi, basibonege imbombo syinu inunu, abandu aabikuntuufyaga Kyala kunongwa jinu pi isiku lya balongi bwake.

<sup>13</sup> Mwijiisyege ku balongosi boosa, paapo muli bandu baa Ntwa Jesu. Mummwimikege umalafyale gwa kiisu, paapo umwene jo ndamuli unkulumba ugwa bandu boosa.

---

\* **2:8 2:8** Bala kalata gwa Jeosaja 8:14. † **2:9 2:9** Bala kalata gwa Ukusooka 19:5-6.

14 Kangi mubiimikege abalongosi baa fiisu, paapo umalafyale abasalile ukubafunda abandu aba bikutula inongwa, nu kubatuufya aba bikubomba inunu.

15 Po Kyala ikulonda mubombege inunu, ukuti abakonyofu aba bakasyagania kanunu, balingajaga nalyo nalimo ilya kubajoba ububiibi umwe.

16 Umwe muli baabuke, leelo mulingabombelaga ubwabuke bwinu ukubomba imbiibi, looli mutugalege bo muno ababombeli baa Kyala bikulondeligwa ukutugala.

17 Mubiimikege abandu boosa nu kubagana abiiiki biiniinu. Muntiilege Kyala nu kummwimika umalafyale.

### *Ukwikasya mu ngubilo*

18 Linga ugwe eli ntumwa gwa nkabi pakiisu apa,‡ gwijiisyege kumyake, kangi ummwimikege. Kukaja kokuti umwene nnunu kangi moololo itolo, looli nalinga umwene nkali.

19 Linga kuumiilila ukutaamigwa, ku nongwa jaa kunngana Kyala, kisita kutula inongwa, kusajigwa.

20 Linga kubomba kabiibi kangi kuumiilila mu ngubilo isya kukufunda ku ubiibi, bule kwinozona ukuti kwambilila induufyo? Looli linga kuumiilila ukutaamigwa paapo ubombile inunu, po Kyala ikukusaja.

21 Mukooleligwe ukuti muumiililege bo uo paapo Kilisiti juujo aalyumiilile ukutaamigwa kunongwa jiiinu. Umwene gwa kukeetelamo,

‡ 2:18 2:18 *Untumwa gwa nkabi pakiisu apa* Bala iisyu *Untumwa* ku isyakulingaania.



ukuti mwendege mu njila jilajila bo iji aalyendile umwene.

<sup>22</sup> “Umwene akaatulile inongwa,  
pamo ukujoba ubutungulu bumo nkanwa  
mmyake.”§

<sup>23</sup> Bo bikuntuka akaagomwisye iisyu nalimo ilya kuheelula. Bo bikuntaamya akaagelilepo ukubagomokesya lyolyosa ilya kubatiilisa. Looli syosa aalindekiile Kyala uju ikubalonga abandũ ku bwanalooli.

<sup>24</sup> Kilisiti jujuo aapimbile ubutulanongwa bwitu mu mbili gwake pa kikohekano, ukuti uswe tugoge ifinyonyo fyitu ifi fikutupela ukubomba ubutulanongwa, looli tukabe ubuumi ubwa kunkyela Kyala. Umwene aakabile ififulalo ukuti umwe mupone.

<sup>25</sup> Mwasobile bo ulwa ng’oosi isi sisobile injila, looli lilino munngomokiile uNtwa Jesu, uNtiimi gwĩnu uju ikubalindilila.

### 3

*Imanyisyo sya kajilo akanunu ku bandũ abeegi*

<sup>1-2</sup> Mwe bakiikulu, mwijiisyege ku balume biinu. Ku njila ijo, nalinga abalume biinu batikalikonga iisyu lya Kyala, bikutenganaga ku kajilo kiinu akaa lwimiko na lwijiisyo. Po abalume biinu aabikufikilapo ukummwitika Kyala, kisita umwe ukubabuulapo iisyu nalimo.

---

§ 2:22 2:22 Bala kalata gwa Jeesaia 53:9.

<sup>3</sup> Ƴbununu bwinu balingajaga bwa munyuma, bo ukuluka inywili, ukufwala ishabu pamo imyenda igya lwimiko,

<sup>4</sup> looli ubununu bwinu bafumege nkati. Ƴbununu ubu bwa ndumbula ijaa booloolo na iji jitengeene. Kangi butikoonangika pamo ukukulupa. Ƴbununu ubo bwa ntengo nkyeni mwa Kyala.

<sup>5</sup> Ijolo abakiikulu abiikemo aba bansubilaga Kyala, biinosyaga bo ulo ku njila jaa kajilo akanunu, akaa kwijiisya ku balume baabo.

<sup>6</sup> Unkiikulu jumo ujua aabombile bo ulu jo Sala ukasi gwa Abulahamu, ujua iijiisya ku ndume antigi, "Ntwa gwangu."\* Umwe muli baanaake. Kunongwa ijo mwendelelege ukubomba inunu, nalinga bikubatiisya.

<sup>7</sup> Na nuumwe mwe banyambala mwe beegi, mukulondigwa ukuti mutugalege kanunu na bakasi biinu, paapo mumeenye ukuti bakaja na maka bo agiinu. Kangi mubakeetege ku lwimiko, paapo Kyala abapeele umwe mwesa ubuami bwa bwila na bwila. Po leelo mubombege bo ulo ukuti inyiipuuto syinu silingasigiligwaga.

*Ƴkutaamigwa kunongwa jaa kubomba inunu*

<sup>8</sup> Isya kamaliikisya, mujege ni ndumbula jimojeene, mwinogonege limolyene, kangi mutulanene. Muganenege paapo muli bukamu ndwitiko, mujege booloolo kangi mwijiisyege.

<sup>9</sup> Mulingagomokesyaga ububiibi ku mundu ujua ababombiile kabiibi. Abandu bo

---

\* 3:6 3:6 Bala kalata gwa Ƴbwandilo 18:12.

bikubataka, mulingagomokesyaga amaheelu, looli mubasajega. Paapo Kyala aabakooliile ukubomba bo ulo, ukuti mukabe isajo syake.

10 Isi sili bo ulu Kalata uMwikemo ikuti,  
 “Gwesa ujū ikulonda ukutuugala kanunu nu  
 kaja ni sajo,  
 aleke ukubaheeha abandu nu kutungulupa.

11 Aleke ukubomba imbiibi, looli abombege  
 inunu.  
 Alusuubilege ulutengaano nu kulukonga fi-  
 ijo.

12 Namanga Kyala ikubakeeta abandu abagolofu  
 ku kibabiilisi,  
 kangi ikwambilila inyiipuuto syabo.

Looli aba bikubomba ubutulanongwa,  
 ikubasinda iikosi.”†

13 Linga mukwijūula ukubomba inunu, jo  
 jwani abagiile ukubabombela kabiibi?

14 Looli nalinga mukutaamigwa kunongwa  
 jaa kubomba isya bugolofu, Kyala ikubasaja.  
 Po leelo mulingatiilaga bo bikubatiilisyā, kangi  
 mulingapaasyaga.‡

15 Looli mummwimikege Kilisiti ukaja Ntwa  
 mu ndumbula syinu. Mwitendekesyega  
 akabalilo koosa ukummwamula gwesa ujū  
 ikulaalūsyā isya lusuubilo lwinu. Looli  
 mubombege bo ulo ku boooloo nu lwimiko,

16 ni ndumbula inyeelu. Po aba  
 bikutungulupa kunongwa jaa mbombo inunu isi  
 mukummbombela Kilisiti, sibakolege isoni.

† 3:12 3:10-12 Bala kalata gwa Isabuli 34:12-16. ‡ 3:14 3:14  
 Bala kalata gwa Jeesa 8:12.

17 Kūnunu ukukindapo ukutaamigwa kūnongwa jaa kubomba inunu, linga bo bwigane bwa Kyala, kuliko ukupeeligwa ingubilo na Kyala kūnongwa jaa kubomba imbiibi.

18 Joope Kilisiti aakubiilwe nū kufwa kamo-keene itolo, kūnongwa jaa butulanongwa bwa bandu. Na paapo umwene ngolofu, aabafwiliile mwe butulanongwa ukuti abafwanie na Kyala. Aagogiigwe bo ali nū mbili, leelo aasyukile kū maka agaa Mbepo Mwikemo.

19 Kū maka ago aasilambiliile syope ni mbepo inyali, isi syapinyiigwe mu nnyololo.

20 Ijolo imbepo inyali isyo syakaanile ukuntiila Kyala, bo Nwaka ikujenga ingalaba. Kyala aaba-keeteliile imbiibi syabo mpaka akabalilo aka ingalaba jaatendekesiigwe. Looli kummaliikisyo abandū banandi, kokuti abandū lwele itolo, bo aba Kyala aabapokile. Nalooli baapokiigwe kū njila jaa miisi.

21 Na nuumwe mupokiigwe akabalilo aka kū njila jaa miisi, kokuti amiisi agaa loosyo lwinu. Kūnongwa ijo, ulosyo kukaja ko kusoosya imbiibi kwene, looli ko kunkonga Kyala ni ndumbula inyeelu. Uloosyo ulo lukubapoka kū njila jaa kusyuka Jesu Kilisiti.

22 Kilisiti ujo alinkubuuka kumwanya, kukibafu ikiiliilo kya Kyala, pabujo ubusisya fiijo. Ikubalagila abandūmi, pamopeene ni fipeligwa ifingi fyosa, ifi fili nū bulagili na maka.

## 4

*Akajiilo aka kikunkyela Kyala*

1 Nuumwe mwitendekesyege ukukubilwa bo Kilisiti, paapo umwene aakubiilwe umbili gwake. Ngujoba bo ulo paapo Jesu, ku njila jaa kukubilwa kwake, aabutolile ubutulanongwa ubwa bandu.

2 Po mbuumi bwinu mutikulongosigwaga ni finyonyo fya mbili, looli mukutuugalaga bo muno iiganiile Kyala.

3 Ijolo mwaliisibiile ukukonga akajiilo akaa bandu aba bakammanya Kyala. Akabalilo ako kamaliike. Kangi mwaliisibiile ukulogwa bo abeene nu kulagiligwa ni finyonyo fyinu, mwa-gaalaga, mwabiikaga ulusekelo lwa kulya ifindu ku bupafu. Kangi mwipuutaga ku fipeligwa ifi akaja jo Kyala, akajiilo ako kikunkalasya fiijo Kyala.

4 Abandu aba bakammanya Kyala, liilino bikuswiga paapo mutikulongosania nabo ukubomba imbiibi, po bikubatuka umwe.

5 Looli abeene bikwisa kwijobela isya kwinkesya nkyeni mwa Kyala, ujw iitendekiisye ukubalanga abandu boosa, abuumi na bafwe.

6 Fyobeene abandu aba baafwile, boope baalumbililiigwe indumi inunu, ukuti balongigwe imbombo syabo isya mu mbili, kangi bajege nu buumi ku maka agaa Mbepo Mwikemo nkyeni mwa Kyala.

7 Amasiku gaa kummaliikisyo gasegeliile, po leelo mujege maaso nu kwitiima, ukuti muje na maka agaa kwipuuta.

8 Akakulumba kuli syosa, mugananege mbwanalooli, paapo linga muganeene fiijo,

kukusigila ukubombanila ubutulanongwa.\*

<sup>9</sup> Mwiganenge ukubambilila abandu nnyumba syinu ni ndumbula joosa.

<sup>10</sup> Kukuti mundu ikulondigwa ukukibombela kanunu ikikungilwa kyake, iki apeeliigwe ukubatwala abanine, bo umwimilili ungolofu ugwa ipyana lya Kyala ilya luko lwingi.

<sup>11</sup> Gwesa ujw ali ni kikungilwa ikya kujoba, ajobege mbwanalooli bwa Kyala. Ujw ali ni kikungilwa kya butwuli, abatuulege abanine ku maka aga Kyala ampeelee. Ku njila iyi, Kyala atuufigwege ndi syosa kunongwa jaa Jesu Kilisiti, ujw ali nu busisya nu bulagili ubwa bwila na bwila. Ameni.

*Ukukubilwa kunongwa jaa kunonga Kilisiti*

<sup>12</sup> Bakundwe, mulingaswigaga ukukaba ingubilo isi sikookya bo ulwa mooto ukali, ukuti mugeligwe. Isi silingajaga heesya.

<sup>13</sup> Looli muhobokeye mbuliilanisi bwa ngubilo sya Kilisiti, ukuti mukaje nu lusekelo fiijo iisiku lila, bo ubasisya bwa Kilisiti buketuligwa pabwelu.

<sup>14</sup> Linga bikubatuka paapo mukujisuubila ingamu jaa Kilisiti, musyaganiege ukuti mukusajigwa, paapo kokuti Mbepo unsisya ugwa Kyala ali pamopeene na nuumwe.

<sup>15</sup> Linga mukukubilwa, mulingakubilwaga kunongwa jaa kugoga, ukwiba, ukubomba imbiibi, pamo ukwingilila inongwa isya bandu abangi.

---

\* 4:8 4:8 Bala kalata gwa Isya Mbupingamu 10:12.

16 Looli linga mukukubilwa kunongwa jaa kaja Bakilisiti, isoni silingabakolaga looli muntuu-fyege Kyala, paapo mukujipimba ingamu jilajila ijaa Jesu.

17 Akabalilo kaa kulongigwa kafikile, Kyala ikutala ukubalanga abandũ baake. Po linga ikutalapo ukutulonga uswe twe bandũ baake juujo, bũle, aba batikujitika iNdumi iNunu ijaa Kyala, ukulongigwa kwabo aakutikwisa kaja kwa kutiilisa fiijo?

18 Bo ulu Kalata uMwikemo ikuti,  
“Linga abagolofu aabikupokigwa ku butolwe,  
sikwisa kaja bũleebũle ku batulanongwa  
aba bakampanya Kyala?”†

19 Po leelo, abandũ aba bikukubilwa paapo Kyala aasibaatiike bo ulu, bendelelege ukubomba inunu nu kwibiika mmaboko gaa Kyala, uMveli gwabo unsumbiligwa.

## 5

### *Ukukitiima ikipanga kya Kyala*

1 Lilino ngubakasya, umwe mwe bakulu baa kipanga kya Kyala. Une ne nkulu mwiniinu gwa kipanga kya Kyala. Ndi nkeeti gwa ngubilo sya Jesu Kilisiti. Kangi ngusubila ukwambilila ubasisya pamopeene nagwe, pakabalilo aka aabukusetuligwa.

2 Po leelo ngubapyelesya umwe, ukuti mujege batiimi banunu baa kipanga kya Kyala, iki abapeele. Kangi mukitiimege ni ndumbula ijaa lusekelo bo muno Kyala ikulondela.

† 4:18 4:18 Bala kalata gwa Isya Mbupingamu 11:31.

Mulingafimbilisigwaga. Mulingabombaga imbombo jiiinu kunongwa jaa kukabilamo itolo indalama, looli mubombege ku maka ni ndumbula jaa lusekelo.

<sup>3</sup> Mulingajaga bakali ku bandu aba mukubalongosya, looli akajilo kiinu kajege kaa kukeetelamo abeene.

<sup>4</sup> Linga mukubomba bo ulu, akabalilo aka untiimi unkulumba ikwisa kuboneka, mukwisa kwambilila ingiga jaa buumi bwa bwila na bwila, iji jitikoonangika.

<sup>5</sup> Nuumwe mwe balumyana, mwijiisyege ku bakulu baa kipanga kya Kyala. Umwe mwesa mujege booloolo fiyo bo muli pakutulana, paapo Kalata uMwikemo ikuti,

“Kyala ikubakaana abaa matingo,

looli abaa lwijiisyo ikubapapo iliipyana.”\*

<sup>6</sup> Po leelo mujege booloolo, mwijiisyege pa bulagili ubwa Kyala, ukuti joope abiinule pakabalilo kaake.

<sup>7</sup> Mundekelege Kyala ubutolwe bwinu boosa, paapo umwene ikubupaasya ubutolwe bwinu.

<sup>8</sup> Lembuka! Mujege maaso fiyo akabalilo koosa. Undugu gwinu Seetano ikulonda umundu gwa kunsofya, bo ulwa ngalamu iji jikubuna, jikunyatukila umundu ukuti jinndye.

<sup>9</sup> Mujege na maka ndwitiko nu kumpinga Seetano, paapo mumeenye ukuti abiitiki biiniinu mfiisu fyosa bikutaamigwa bo ulwinu.

<sup>10</sup> Po bo mukubiilwe kukabalilo, Kyala ugwa ipyana lyosa, ujju aabakooliile ukujamo

---

\* 5:5 5:5 Bala kalata gwa Isya Mbupingamu 3:34.



mbusisya bwake pamopeene na Kilisiti bwila na bwila, umwene aikubatendekesya, aikubakasya, aikubapa amaka, kangi aikubabiika pa lwalo ulwa maka.

<sup>11</sup> Kumyake kujege nu bukulumba bwila na bwila! Ameni.

*Uluponio ulwa kumaliikisya*

<sup>12</sup> Sila, umwitiki mwiniitu, umundu ungolofu bo muno une ngummbonela, jo ujũ andũulile ukusimba kalata ujũ umpimba. Ngulonda ukubakasya nu kubasisimikisya, ukuti indumi iji nalooli lyo ipyana lya Kyala. Mwimege kanunu mwi ipyana ilyo.

<sup>13</sup> Ikipanga kya Kyala iki kilimo mu Babeli,<sup>†</sup> aba basunguliigwe na Kyala, bikubaponia. Kangi umwanangu ndwitiko, ujũ ingamu jaake jo Maalika, ikubaponia.

<sup>14</sup> Muponaniege mwesa nu lugano, bo muno mukuponania na bakamu biinu.

Ulutengaano lujege na nuumwe mwesa mwe muli mwa Kilisiti.

---

<sup>†</sup> **5:13 5:13** *Mu Babeli Kokuti Mu Looma.* Babeli jaali ngamu iji baajibombelaga ukubujoba ubunyafyale ububiibi.

**Ulwikano Ulupya**  
**Nyakyusa-Ngonde: Ulwikano Ulupya (New**  
**Testament+)**

copyright © 2019 Wycliffe Bible Translators, Inc.

Language: (Nyakyusa-Ngonde)

Contributor: Wycliffe Bible Translators, Inc.

All rights reserved.

2020-11-30

---

PDF generated using Haiola and XeLaTeX on 18 Apr 2025 from source  
files dated 29 Jan 2022

14ff4521-53e4-562c-aacb-6f4faf55a6c8